

ROSELAND DI ALHAMBRA BAZAR INAUGURA

Show fantastico presenta den Teatro Aladin

ORANJESTAD(AAN)— Den e teatro nobo di Alhambra Bazar a ser teni un pre-view di e shownan cu lo tum alugar eynan y un cantidad di personahe invita a presencia e show aki y disfruta di e prome anochi di Roseland despues.

Artistanan local y internacional a tene e show den e teatro Aladin y por a ripara cu un bon seleccion a tuma lugar tambe.

Manera ta conoci pa medio di avisonan a ser pidi na artistanan pa duna un show di prueba na Cas di Cultura, y for di e artistanan aki a selecta esnan pa e shownan den Alhambra Bazar.

Paradise Orchestra bao direccion di maestro Ivan Jansen a demostra cu na Aruba tin musiconan profesional y na hopi ocasion mihor cu esnan profesional cu ta ser contrata di exterior door di hotelnan.

Paradise Orchestra tabata magnifico den su debut y acompañamento di artistanan local y internacional e anochi aki.

Sonia Gevers tambe a duna un presentacion cu su grupo di baile y pa e nivel aki, e cantidad di aplauso ricibi por bisa cu e grupo aki sigur lo bay cosecha hopi exito den su presentacionnan despues di apertura oficial.

E turistanan presente a

keda tambe masha encantado cu e show cu a ser presenta pa Adwin Abath y Aky Nijhuis. Nan a ricibi un ovacion tremendo. Otro grupo cu a sorprende tur e bishitantenan tabata The Young Voices y especialmente nan show a ser hopi gusta.

E show mas espectacular sinembargo tabata di Bacalu Dance Company di Haiti. E grupo aki a duna muestra di bailenan folklore di Haiti, baile ariba musica di tambor y baile di voodoo.

Despues di e show, tur hende a pasa di Aladin Teatro pa sala di baile Roseland unda e orquesta di Roseland a percura pa musica di añanan 40 y 50 cu e cantante Carol Caess. E lo actua dos luna den Roseland.

Dentro di algun dia lo anuncia apertura oficial di e Teatro mientras cu ayera anochi Roseland a keda inaugura oficialmente.